

NAQQIUT

Matuma aalajangiiffigisassatut siunnersuut 1. juli 2013-meersoq taarserpaa.

Aalajangiiffigisassatut siunnersuut nutaamik oqaasertalerneqarsimavoq. Taamaasilluni taasinnissami suleqatigiit erseqqissaavigineqarput taamatullu tunngavilersuut erseqqissaavigineqarluni. Oqaatsit atorineqartut iluarsartuunneqaannarput.

Matumuuna Inatsisartut suleriaasianni § 33 imm 1. naapertorlugu aalajangiiffigisassatut siunnersuut imaattoq saqqummiunneqassaaq:

Nummi umiarsualivittaassap sanaartorneqarnissaanut ingerlanneqarnissaanillu siunertaqartumik aktiaateqarluni ingerlatsivimmik pilersitsisoqarnissaanik kingusinnerpaamillu UPA2014-imi ingerlatsiviup umiarsualiviullu pissutsinut nalimmassarneqarnissaa pillugit Naalakkersuisut 2013-imi suliakkerneqarnissaat pillugu Inatsisartut aalajangiiffigisassaattut siunnersuut.

(Naalakkersuisut siulittaasuat, Aleqa Hammond, Siumut)

Tunngavilersuut:

Nummi Umiarsualiviup allilerneqarnissaanut tunngatillugu 2013-imi upernaakkut inuiaqatigiinnut aningaasatigut qanoq kinguneqarnissaanik naliliinerit sukumiisut Assartuussineq pillugu Isumalioqatigiissitap inassuteqaataanut naapertuuttut pisimapput. Qanoq kinguneqarnissaanik naliliinerit tunngavigalugit Naalakkersuisut Nummi nutaamik umiarsualiviliortoqarnissaanik siunnersuuteqarput, tassani pineqarlutik kitaanut sammernanganut talittarfiliinissaq qeqertallu Qeqertat aamma Fyrø-p akorngatigut alliffissalerlugu umiarsualiviliornissaq.

Sanaartornerup nalaanik aningaasaliinissamillu naleqquttumik pilersaarusiornissaq eqqarsaatigalugu 2013-imi Naalakkersuisut nutaamik ingerlatsiviliornissaat siunnersuutiginerpoq, tassani Nummi nutaamik umiarsualiviliornissamik sanaartornissaq ingerlatsinissarlu siunertarineqassallutik. Peqatigitillugulu Nuup maannakkut umiarsualivia ingerlatseqatigiiffimmut ilanngunneqassasoq, kiisalu ingerlatseqatigiiffik aningaasatigut pertujaannerusumik tunngavissikkumallugu 40 mio. kr.-inik atukkerneqassasoq siunnersuutiginerpoq. Umiarsualivimmud ingerlatseqatigiiffimmut atukkiineq Nukissiorfimmut atukkiussat 40 mio. kr.-inik appartinneqarnerisigut pissaaq, tamannalu FL 2013-imi konto pingaarnermi 10.13.11-imi takuneqarsinnaavoq.

Nummi umiarsualivik umiarsuarnit anginerusunit taliffigineqartalernissaanik annertussuseqassaaq nunalu tamakkerlugu pingaarnertut umiarsualiviussalluni. Nunatta sinnerata pitsaannerusumik kiffartuunneqarsinnaanera periarfissaalissaaq, tassa usit nunatsinnukartut umiarsuit anginerusut nalinginnaanerusullu aammalu avatangiisinut mianerinninnerusut atorineqarsinnaalissammata. Usit Nummi umiarsuarnut immikkut ittumik sananeqarsimasunut umiarsualivinnut mikinerusunut tlassinnaasunut nussorneqartassapput. Sanaartornerup nalaani aningaasaliinissamillu naleqquttumik aaqqissuussinissaq siunertaralugu siunnersuutiginerpoq Naalakkersuisut 2013-mi ima pisussaaffilerneqassasut:

UPA2014-mi pilersitsinermut aamma sanaartornissamut inatsimmik Naalakkersuisut saqqummiussinissaminut pisussaaffilerneqassapput, tassanilu aalajangersarneqassaaq

Ingerlatseqatigiiffiup siunertaa tassaassasoq niuernermik tunngaveqartumik sanaartornissaq, piginnittuunissaq Nuummilu umiarsualivinnik atortorissaarutaanullu taamatullu ingerlatsinernut assingusunut ingerlatseqatigiiffiup malittarisassaani allassimasutigut ingerlatsisuunissaq. Kiisalu ingerlatseqatigiiffiup siunertaa tassaasoq umiarsualivimmik aningaasatigut atuilluartumik ingerlatsinissamik qulakkeerinissaq, taamatullu Kalaallit Nunaannut utimullu kiisalu nunatta iluani imaatigut pitsaasumik angallannissamut peqataanissaq.

Taamatut oqaaseqarlunga aalajangiinissamut siunnersuut manna Inatsisartunit oqaluuserilluarneqarnissaanik kissaassillunga ingerlateqqippara.

Tusarniaaneq

Tusarniaanermi akissuteqaat ilanngullugu nassiussaq takuuk

Aningaasatigut kingunerisassaa

Tassani AI2013-imi kontomut pingaarnermut 10.13.11-imut oqaasertaliussanut nassuiaat kiisalu kontomut pingaarnermut 87.73.10-mut oqaasertaliussanut nassuiaammut oqaaseqaatit innersuussutigineqarput.